

四庫全書

集部

欽定四庫全書

集部  
稿李詩繫卷十二

詳校官侍講<sub>臣</sub>王燕緒

主事銜<sub>臣</sub>徐以坤覆勘

總校官進士<sub>臣</sub>朱 鈐

校對官編修<sub>臣</sub>蕭九成

謄錄監生<sub>臣</sub>呂 蟠

欽定四庫全書

馮李詩繫卷十二

平湖沈季友編

明

鄭端簡公曉

曉字室甫號淡泉海鹽人少好嬉戲乘屋緣木蹻  
捷自喜八九歲時猶被絮襖逐羣兒捕蚌也然授  
以經傳子史及字義講解輒能通之嘉靖壬午鄉

舉第一癸未成進士為兵部主事日閱故牘盡知  
天下阨塞與士馬虛實強弱之數撰九邊圖誌一  
時士大夫始知曉為經世才因議大禮杖闕下後  
轉文選郎分宜用事為子世蕃求璽丞曉謂非故  
事分宜大恨貶和州判廻翔南卿寺十年始以刑  
右侍改兵部巡撫鳳陽時倭寇江之南北曉日夜  
謀勵將士戰於海門狼山等處俱大勝斬獲殊衆  
曉素以文學聞又癯然若不勝衣而乃以武功顯

人益知其不可測累遷吏部尚書右都御史改刑  
部尚書時有大獄如張紳等忤時宰郭希賢諫立  
儲王抒阮鵬誤軍機及畱都兵變通倭釀亂數事  
皆與分宜不合益構之落職歸既卒詔復其官穆  
宗即位贈太子少保謚端簡曉問學淹博經濟宏  
深性儉朴編纂不倦著有吾學編古言今言奏議  
文集等書

中秋憶陶選部

為憶雙泉子，今秋尚戍邊。百年心共苦，萬里月同圓。  
生死憑誰問，饑寒獨爾憐。殘星過斷雁，愁絕塞門烟。

自題百可園

吾生已如此，抱病對朝暉。梅老花偏密，桑柔葉正肥。  
隔溪聽鳥喚，倚檻看魚飛。幽意那不愜，誰云心事違。

乾坤長變化，日月共居諸。海內誰知己，山中此舊廬。  
榮光卑二鳥，憔悴憶三閭。謝卻周公夢，冥心混沌初。

秋日海上

孤城海上若星棋聞說三遷事更悲百谷東南空地力  
九秋潮汐自天時黃灣水落魚蝦亂白塔烟深草木遲  
暮鼓年來猶未息何人肉食抱長思

獨立滄溟嘆禹功長隄隱見亂濤中鹽田何處蘆花雨  
茅屋誰家燕子風漂泊苔痕連水碧參差楓葉帶霜紅  
珊瑚樹底垂綸者豈盡天涯白髮翁

諸將四首

太原天陰傍雲中保障今誰第一功西顧榆林東上谷

漢家京兆北扶風

朔馬前驅摧紫塞材官北面守黃河風塵不斷千山動  
渾脫相牽一葦過

驃騎未搜青海賊匈奴還結黑山奚朱旗夜躡雙城破  
白骨秋憐萬鬼啼

制府魚符縛錦幃將軍虎印卧征徽隔山傳箭催朝食  
對面援兵怕解圍

吳尚書鵬



鵬字萬里號默泉秀水人嘉靖癸未進士授工部  
主事叅議黔閩以平寇著聲晉刑部侍郎時河決  
徐淮饑饉相望鵬往賑截漕糧濟之尋以兵侍兼  
副都御史督理漕河先是有神降桃源能人言自  
稱柳將軍數為河患忽一日曰吳公至我去矣及  
鵬至而決口立塞又以平大盜師尚詔功陞工部  
尚書晉冢宰掌銓衡者六年時嚴嵩柄政鵬不無  
脂韋取容國史有遺議焉歸田之後卒至賈禍可

歎也著有飛鴻亭詩

贈林雙峰

天馬橋東宅高人舊隱居  
開軒延素月灌藥引通渠  
徑滿陶潛菊家傳伏氏書  
有時叨客至自釣錦川魚

南湖

為欲留春住開尊得賞心  
湖天浮曙色堤柳足清陰  
燕掠芹泥墮魚穿荇帶深  
逢從羣彥後佳會許重尋

松風亭

亭帶蒼崖古松擎翠蓋鮮敗垣蝸篆引高樹鶴雛眠野  
寺餘春釀送邨接暝烟絃歌非魯邑耕鑿總充天

過黃塘懷洞陽公

汎汎青溪水何當此地經江沙連月白嶺樹入雲青歸  
去覺今是行吟憐獨醒側身天北澗莫誦首陽苓

次府江感懷呈劉憲使

上化灘前晚繫舟黃茅嶺接楚雲秋一天瘴雨來殘夜  
千里蠻江有急流短髮獨搔猿送淚疎燈自照角添愁

却憐留滯炎荒客已似當年柳柳州

王知州經

經秀水人嘉靖壬午舉人官知州

輓張雙溪

許國身曾萬里還蜀江塵土暗重關淒涼墓木今成拱  
落日悲風滿故山

馬蘄州淮

淮字元豫號乾庵秀水人嘉靖壬午舉人官蘄州

知州

赤壁

江中白鶴影雙下山外遊人時一來千古江山只如此  
且須把酒放眉開

袁高士仁

仁字良貴號參坡嘉善人

或云蘇州人誤

凡天文地理律

歷書數兵法水利醫卜之屬靡不究心謂醫可濟  
人遂寓意於醫崑山魏校疾使三至仁謝曰君以

心疾召我但當咬咀仁義炮治禮樂以療之不然  
雖十至不來也仁以祖父皆習春秋有論著復憫  
世儒溺胡而不信也乃作鍼胡編詩亦斐然氣殊  
蒼樸著有一螺集

畫竹謝沈啟南

昨見石田子惠我一幅竹蕭然展閱清風生丹鳳翩翩  
下淇澳彷彿坐我瀟湘間葉葉飛霞起華屋見竹如見  
石田子高節凜然凌衆木一枝獨倚巖谷寒江水涵涵

為誰綠為君深貯莫輕開  
葛陂風雨愁龍觸

幽澗泉

金谷對叢林高人此夜情  
引瓶清露裊汲月曉寒生  
漱玉雲花落珍黃梵宇清  
翻憐行路客到處覓遺甕

弔梅道人墓

日落霜飛百草枯  
橡林暮雨咽寒烏  
空留妙墨驅塵世  
猶有清風拂酒壚  
古壠烟浮閒夜月  
空林露冷滴庭梧  
只今歌舞樓前月  
不照梅花塔影孤

香和庵

竹鎖茅庵野水邊松篁滿地獲茶烟三千法界元非遠  
五百聲聞別有緣斷碣卧雲踈雨裏香臺橫草落花前  
山人自證無生訣不學空門五味禪

附考庵在嘉善東南  
十五里元至正建

久雨

四月沉陰水拍扉客窓猶未減寒衣澗蓬急溜渺難度  
竹鎖殘雲濕不飛苔蘚上階連草綠蟪蛄啼雨落花稀



白頭更覺長安遠盡日江頭坐釣磯

陳氏園

長安宮殿總成塵悵望豪華立水濱  
荒苑有禽春草碧故園無主野花新  
習池錦帳風前絮金谷明珠夢裏人  
試看武塘川上月已沉幽澗照青蘋

寄沈一之

衰草殘陽滿地紅蘋花零落野塘風  
一枝多少懷君夢半在青燈細雨中

神仙宮看竹

仙家有地只種竹多少清風激懦夫滿院綠陰餘晚節

桃花應合笑玄都

附考宮在嘉善治東  
二里唐開耀間建

聞王伯安謫龍場

白簡霜飛拂紫宸一鞭遙指瘴江春孤身願作南飛雁

萬里隨雲伴逐臣

聞王伯安靖江西

當年談道薄鸞湖此日揮戈靖國魔  
夜靜燈前看寶劍  
先生應悔殺人多

沈舉人燭

燭字伯遠一字世明號石聯嘉善人概從子嘉靖  
乙酉舉人居家動遵古禮日唯唔不輟其詩清勁  
有石聯稿子士立亦能詩

尊空

菱青竹碧山雲鮮客子狂歌清渭邊  
風鶴背唳當徑樹

暖魚睛跳隔溪船  
凌競石岫將誰往  
狼籍烟花亦可憐  
酒盡鳬飛相趁逐  
青錢隨意買江天

范同知言

言字孔嘉號菁山一號訥齋秀水人嘉靖丙戌進士自蒲圻令陞大理府同知致仕言博綜經史善屬文與比部彭輅相頡頏范尚體裁彭尚才藻兩家各負氣不相下而時論左袒於范予特以詩較則彭有高調范稍柔脆矣有菁陽集

酌賈實齋憲副

水暖躍春魚山晴照客居  
菰蒲淮水際松檜漢年餘  
酒熟雲安市田荒鄴下渠  
嬌兒勝筆硯塗抹老夫書

湖上

誰開湖上閣獨對晚來曛  
鶯語排花出潮聲帶雨分  
遙看鄰牧散閒與海鷗羣  
自笑江干老悠然卧白雲

金明寺佛閣

湖曲深藏寺城陰別起樓  
登高公事了避暑醉鄉遊  
淨

啟青蓮社晴分白鷺洲凭虛問牛斗江漢幾時秋

陸巡撫邨

邨字秀卿號簣齋自稱一簣山人嘉善人嘉靖丙戌進士授南京刑部主事道自河間郡守惡其倨居以廢館館多祟遇者輒死比暮與阜慄慄告出惟二童子畱既寢夜半有聲剗然其怪頽然而黑立於榻前邨怒以手擊牀曰我陸邨也汝何為怪遁去至南都平反冤獄每與大理相軋時嚴嵩為

南禮侍屢造邛邛拒不見曰此人雖有時名實奸  
雄也未幾出知常德府調武昌尋改岳州歲饑邛  
不待奏報發倉賑之御史伊敏生至府邛供奉甚  
簡敏生入其衙唯蒼頭二人敝篋無鎖檢之唯殘  
書百卷布衣數件而已遂疏薦拜太僕少卿歷陞  
僉都御史巡撫河南乞歸有簣齋集

一簣山人歌

一簣山人歸武陵自云作吏非所能上世本是農夫家

中歲頗多丘壑情憶昔十五時讀書始趨庭庭前一簣  
土乃是先人營三十射策登帝廷四十剖符慙專城中  
駁外歷靡寸補千憂百慮何時寧風塵歲月厭奔走笑  
言眉睫羞逢迎匡廬觀瀑欲大叫洞庭醺酒愁冥冥懷  
賢幾自跨黃鶴訪隱常作桃源行一朝得調忽辭去掉  
頭那管人間名乘興還迴剡曲棹遺安况有鹿門耕不  
能如馬長卿著封禪書不如能揚子雲草太玄經不能  
如陶朱逐時事貨殖不能如赤松辟穀學長生吏少門



前租僅足客來花下酒常傾不愁兒癡是豚犬不恤宦  
薄非公卿顧以人生百年內塊然簣土猶無成悲來風  
木不自禁三釜那得為親榮仰看蒼天摩九仞此意突  
兀難為平

上鷹歌

君不見楚澤之上鷹爪利若擘目若星雄姿逸氣何橫  
生翻身猶能墜鵬翼豈但可使燕雀驚稜稜勁翮秋風  
裏遠勢未看窮所止壯心誰謂便相拋籬落聊迴啄文

雉

築堤謠

彼田高我田低高田積土河成蹊低田年年催築堤築  
堤復取田中泥今年大水百穀傷高田得熟低田荒遂  
令低鄉有田者唯願有田在高鄉君不見土龍三日雨  
莫禱高鄉之田為茂草

登胥山

伍胥來駐馬見說此山頭草木兵猶似乾坤氣未收蒼

霞含宿雨野屋抱寒流日晚一登眺天風吹客裘

訪柯侍御九華山中留贈

趨朝同聽午門鐘九陛森嚴虎豹重何事歸來化城卧  
硯屏閒弄九芙蓉

洞庭歌

巴陵城頭白鶴迴巴陵城下洞庭開湖面青山隔簾檻  
暖風吹送酒香來

賈汝寧名儒

名儒號實齋嘉興人嘉靖丙戌進士授刑部主事  
抗節持法出守姚安再補汝寧會世廟躬詣顯陵  
時皆欽民以應名儒悉還給民德之乞休後詔起  
憲副力辭

玉龍山館訪薛鶴樓不遇

鶴樓何處是窈窕入烟霏陟石雲生屐穿花露濕衣虛  
枰松底列野鳥竹間飛聞說尋僧去吟筇在翠微

屠諭德先生應竣

應埈字文升號漸山康僖公第六子嘉靖丙戌進士選庶吉士調禮部郎乙亥復晉諭德同時吳門袁永之錫山華子潛四明陳約之晉江王道思並有盛才與之友其學日益闳大如議禮疏及薛瑄從祀疏皆有原本尤長於詩諸體雄麗允為七子開先王弼州稱其詩含華茹英輝皎奕奕陳黃門詩選中亦多推重之詞著有蘭暉堂集生平好為奇節豪宕風發飲酒百鍾不醉又好內後

庭多稚齒媿之人卒以病廢方竣之生也康僖  
公筮之得震之漸曰鸞德如玉飛上高木鼓其羽  
翼光照四國及歲乙巳夢謁衡山君有書在廡間  
曰明年正月十三日官至二品增年一紀晨起呼  
諸子曰我殆將死矣我宦遊二十年官不踰五六  
二品增紀者其易歲之兆乎如期卒

霸陵篇

憶昔漢文帝行遊霸上園遙指新豐道回瞻渭水原倚

歌未終曲慷慨啟長嘆  
擲發北山石紆絮斲其間  
左右相噉噓嗇夫前致言  
請觀秦皇帝壯哉營鄠山  
白日避層闕銀流涸重淵  
玄臺玉衡建幽圉青藜懸  
六宮既同盡千夫亦何寃  
金湯萬年固陵谷湏臾遷  
愚民諒何知厚塋乃其愆  
片言感宸極納諫如轉圜  
高陵不夷塹卑渠瀉通泉  
聊供陶冶器無改山澤觀  
當年景遺詔後世稱高賢  
巍巍霸陵廟迢迢至今安

高陽行贈范司成菁山

君不見高陽酒徒氣若虹酒酣伏劍謁沛公褒衣側注  
反遭罵豎儒瞋目稱而翁軍門拾謁使者入麾予雪足  
來趨風儒冠自昔為人下豪士累累走中野公卿半屬  
鼓刀人塵埃誰是彈冠者侯門我我仁義存金貂白玉  
多殊恩九達車馬若霆擊中臺咳吐如春溫丈夫風雲  
不自致寧能咿嘵齷齪趨華軒菁山先生真握奇文章  
垂世光陸離懸黎結綠世莫識陽春白雪和者誰憶昔  
予為門下士諸子森森並蘭峙白晝行歌秦駐雲醉後



清心越溪水即今已及十餘年人事升沉豈堪紀鳳儀  
未上金門書呂甥尚曳東郭履琰也雖負鴻漸翼失勢  
青雲未能舉去年有詔收駿骨沉咸十蹶始一起先生  
豈是百里才驥伏鹽車垂兩耳幾年卧遊湘水東洞庭  
雲夢清若空青蠅營營止叢棘白露颯颯摧孤桐長安  
春半氣猶烈上林水冰柳條折潞水挈舟不得行匹馬  
蕭蕭踐冰雪高陽客舍行人疎糜珠斧桂為晨鋪天寒  
首霜芽未茁夜深鼯鼠時相呼鵲袍諸生半僵卧玉署

談經能聽無君不見黃金幾幾千尺臺昭王樂毅俱蒿  
萊漸離擊筑已絕響荆卿易水歌空哀吁嗟乎人生得  
失何須數尊前俛仰成今古時來北闕繫金魚歸去南  
山射猛虎

送林僉憲汝雨兵備潁州

虛庭落日明嘉林薰風吹我堂上琴故人言別赴河潁  
使我不覺生離心援琴欲奏商聲沉感時懷昔多哀音  
憶昔與君同侍輦奏書朝聞夕稱善扈聖親登太乙壇

承恩數奉甘泉宴  
須臾雲雨各西東北  
風栗烈南飛鴻  
君度石梁看曉日  
予隨蘭省卧秋蓬  
故人才高人所羨  
飛藻如烟氣如電  
建節鸞臺日月懸  
橫經彤署星辰爛  
寒霜飛空淒北堂  
三年入謁來明光  
此時正奏甘露至  
金莖不動天風香  
露乳聯珠瑩飛雪  
松雲晝開暮還結  
故人新自故鄉來  
應飽瑤華弄松月  
夜談坐聽填填雷  
擎霄碧玉翻空推  
閉門共讀祥異志  
出門向人還語誰  
九達車馬朝來會  
共議明堂草書對  
近臣新冊定陵功

常侍總承開府貴君不見人生得失難自量天道盛衰  
寧有常朱陽受節蘭蕙芳零露夕變蒹葭蒼時來立取  
封侯印老去猶為執戟郎又不見披裘採薪登後車瑩  
篴在御朱桐虛歲歲南山叩哀角年年東觀著遺書君  
行梁臺度潁水梁苑莓莓夕烟起汴水微茫晝不流唯  
見邙原暮塵紫鳳城東山龍作盤萬年陵闕天南端黃  
河千曲淨迴練蒼厓百疊騫高鸞此中騎士俱羆虎故  
人有文兼有武嵩山雲生拂羽旂淮海風清雜鉦鼓煌

煌絳節坐臨戎俎豆長垂鼎鉉功縱使沙場親校獵絕  
勝芸閣賦離蟲

太乙壇歌

太乙壇高凌紫氛宮中夜夜延神君金盤千尺瀉朱露  
莖臺五色飛龍雲撞鐘鳴鼓邀百祥回旌駐蹕瞻景光  
石檢親封綠文闕河圖著紀赤符昌九華燈明列星爛  
八變樂終萬靈見至尊端笏禮中天北斗垂芒指前殿  
皇皇圭璧奠甘泉奕奕樓居通列仙侍祀獨有東方朔

登歌新協李延年白茅授冊侯五利青鳥銜書作前使  
貝闕徘徊河漢沉絳節繽紛王母至武皇北面來相迎  
稽首至道聞要精能驅三尸鍊五魄可以閱世為長生  
帝聞斯言再拜受宴罷言歸樂無有祈年何必汾水陰  
無為自享南山壽

贈吳山人擴

山人出山何所適來作長安五侯客搗藻朝飛北海雲  
磨崖夜泣南山石長安二月花含烟意氣翩翩俠少年

十場博戲章臺下百發烏號細柳前  
人敝衣衣後穿拾謁欲向何人憐  
投珠委玉盈尺箋餓來不售囊中錢  
短歌為君君自慰且拂琅玕謝時貴  
王生解襪只自嗤世間那有張廷尉

至日憇東平飲趙二元實舍席上贈長句

四明才人趙元實絕壁寒松倚蕭瑟  
逸興飛翻東海雲赤心直指扶桑日  
前年天子罷郊雍金書煌煌命上公  
秉圭植壁對上帝奉璋錫昨俱宗工  
諫臣如麻但僵卧

君獨抗言陳不可批龍已荷明主慈履虎真逢貴人怒  
去年過飲倪生家夜深酒半人爭譁仰天白眼罵流輩  
嚼杯膝席陵豪華人言趙郎太孤立委心置人人不識  
徒手欲裂丞相麻直腰不共將軍揖坐令談笑生戈矛  
白玉被點黃金投鷓鴣一枝聊自適騏驎當途遂晚收  
我來山郭逢長至晤語相歡故人意墨綬猶存粉署香  
鎬宴曾霑赤墀賜自從天上聽簫韶歸向人間厭歌吹  
即今束縛如拘囚青山對面不得遊尊酒豈能容傲吏



冠帶時催見督郵尊前起舞歌向君人生得失如車輪  
君不見甘羅孺兒能貴秦買臣四十行負薪又不見田  
郎一言取相印馮唐十年官不進我今已與滄溟期君  
才不久蓬蒿居盛世豈應無狗監是誰能薦馬相如

送陳約之謁祀孝陵

萬歲橋山路三春草木青乾坤黃鉞在風雨翠華扃北  
極通羣帝中天覲百靈當時貔虎佐一一扈青冥

送同年謝子儒致仕歸蜀

子真棲谷口潘岳賦閒居長揖辭明主為農返故廬雪  
消巴嶺出天入錦江虛莫待揚雄老潛夫早著書

聞南太廟災

金陵自昔建皇興太室中天列祖居聞道振雷三伏後  
遂令煨燼百年餘朱旂寶鉞空人世玉冊金輪返太虛  
帝遣祲祥憂聖主諸臣應有諫彤書

病起

東郭為園枕碧流羣峰合沓俯林丘邨閒晝日驅黃犢

客至晴溪散白鷗  
壁月近臨珠樹晚  
銀河西指越山秋  
思玄欲擬張平子  
卧病無心詠四愁

遊城東觀

病起尋遊強杖藜  
琳宮寂寂枕迴溪  
繁花向日俱宜笑  
幽鳥逢春各異啼  
雲滿客衣庭樹合  
氣薰山酌芷蘭齊  
郊行亦有桃源在  
明日重來路不迷

登太白樓

當時不見謫仙人  
城上樓高空復春  
勢極中原臨岱嶽

境非吾土異三秦  
遙憐避地東方朔  
生有相知賀季真  
斗酒狂歌自今古  
志存刪述與誰論

劉指揮湘

湘字文清號雲巢海鹽人  
嘉靖戊子武舉人官指  
揮

驚香閣

烟邨背郭人家遠  
松壑蘿厓獨自登  
門外泊船秋水寺  
溪頭洗鉢夕陽僧  
買山有意逢支遁  
入社無詩繼薛能

嘯鳥催人歸去晚疎林落葉漏寒燈

附考聞

在桐鄉

陸同知鰲

鰲字子任號南溟平湖人嘉靖戊子舉人官南康

同知

宜春臺晚眺

南下萬山連百越東來一水自長沙石林倒聽秋風起

畫檻平臨返照斜

張同知嘉秀

嘉秀字文英號文川海鹽人七齡和錢福大樹詩  
一時稱神童嘉靖己丑成進士歷南比部郎謫饒  
州同知

秋日偕李拙脩王秋園登金山

清秋倚閣江天迥落日凌虛望眼孤萬里帆檣通北極  
百年遊覽失東吳鼉鼉浪起迴珠閣鶴鶴風高倒練湖  
莫向山僧記名姓狂懷只擬是前蘇

沈副使謚

謚字靜夫號石雲秀水人嘉靖己丑進士授行人  
擢刑科給事中星隕應詔極陳修省劾罷自宮男  
子二千餘人出為山東僉事尋脩兵大庾計擒賊  
酋李彪生平慕王文成之學與羅念庵王龍溪唐  
一菴友善著有家藏稿

遊千佛龍泉洞和康東濱韻

三月鶯花飛欲殘郊原春色亦闌珊青青官柳迎人笑

白白春醪解客寒石竇一龍鳴澗壑上方千佛見衣冠  
勝遊相繼無多日寄語山僧仔細看

祖訓導晟

晟字廷昭海鹽人嘉靖辛卯貢士司訓宿州歸林  
二十餘年嘗卧病鄭尚書就看晟坐黃草蚊幃見  
之恬如也性耽吟咏得句秀拔如碧山吏隱尋松  
子丹井仙方浸木奴人慕荊州求識面誰逢東野  
不低頭有東歸稿



秋夜

晚花含蛭影秋水點螢光一夜思歸夢隨風到草堂

沂陽子王文祿

文祿字世廉號沂川夏號沂陽子海鹽人嘉靖辛  
卯舉人負奇嗜古每憤發必挺劍叱罵不避貴要  
值有司設宴酒酣起舞呼曰此劍能斬貪污其慙  
直如此人皆以為虫家有書萬軸置之一樓俄失  
火大慟曰但力救書者賞他不必也年八十餘吟

誦不止曰我讀來世書耳私謚文定有王生藝草  
考言

走索篇

綵繩百尺闌青天朱竿對起遙相牽廣場突出層臺外  
虹梁平鋪如直絃雙娥靚粧迭呈技一來一去渾爭妍  
玉腕擎衡步移穩恍惚退後還追前特立宮鞋掉羅襪  
丰姿婀娜疑飛仙繡帶飄揚綰晴日翠裙展折拖霏烟  
慢撚纖腰斜擺柳驀佯失跌倒垂蓮怒蚪拔湫迸鎖躍

狡獪升木當空懸莫謂輕身博一笑為君撒盡纏頭錢

走馬篇

燕姬跨馬來江東羅衫窄袖藍對胸翠翹抹額戎裝束  
恍若矯矯飛蒼龍日搖濤影團花碎塵捲風聲彩雲墜  
鬢間暗閃奪珠標腹下還穿撒雕轡將非出塞昭君啼  
無乃歸禁楊妃醉懽娛忘冠擾前秋騎擁嬌娥謔浪遊  
魚麗陣靡誰敢殿長流難洗丈夫羞

包御史節

節字元達別號蒙泉子鼎之孫幼孤力學與弟孝  
相繼成進士節中嘉靖壬辰榜孝中乙未榜為御  
史亦有直聲節由東昌刑官拜御史按閩滇風裁  
特著繼按湖廣巨璫賡贇鎮守為虐節劾其不法  
廷杖謫戍莊浪衛居行間十二年聞母訃晝夜哀  
號又五年弟沒益慟竟以是卒隆慶初贈光祿少  
卿有苑詩類選臺中湟中二集

龍巖曉行

鳥道盤輿迥，龍巖倚漢斜。  
侵星尋石壁，迷瘴問山家。  
過磧惟聞水，穿林不辨花。  
貪程行數里，引炬候明霞。

石屋烟霞

鑿石開蒼嶺，披霞控紫岑。  
潤蒸深洞雨，嵐結廢壇陰。  
茗葉煎春溜，松花摘晚林。  
山僧閒共語，到此益禪心。

五日同雙溪小坐

萬里投荒日，三年去國臣。  
偶逢時序感，重愴別離神。  
擔杏梢雲密，山花過雨新。  
芳華聊可玩，況對故鄉人。

夏日雨後過陳園

選勝遵郊郭，衝泥試杖藜。  
溪承新瀑水，山挂欲晴霓。  
看竹人先至，穿花鳥自迷。  
笑予來幾度，才識小亭西。

玉女潭訪史玉楊吏部不遇

九龍宮觀倚天開，千里崆峒訪道來。  
玉洞雨深新溜乳，碧壇春晚半封苔。  
雲中不見吹笙客，潭上空餘鍊藥臺。  
始信嵇康非俗耦，却憐王烈是仙才。

馮太倉汝弼

汝弼字惟良號佑山平湖人嘉靖壬辰進士任工  
科給事中劾中人張時等下獄冢宰汪鋹恃寵驕  
恣言官爭之不得汝弼投袂起曰擊之不勝則其  
志益驕事有不可言者吾當以死爭連上七疏久  
持不下尋有旨逐鋹時言官廷杖死者二人蔡宗  
愷曾紳汝弼等八人俱外謫得潛山丞遷太倉守  
乞歸有集行世

新竹

夜來湘浦走輕雷驚起斑龍已作堆老夫早起開三徑  
翠尾插天風雨來

愛川惠菊

不道山園菊事荒疎風小雨作重陽喜看折東來秋色  
分得韓公晚節香

錢給事薇

薇字懋垣號海石海鹽人嘉靖壬辰進士授行人  
拜禮科給事在諫垣四年直言剴切天子每急有



任使輒畀錢給事不由推舉如論翊國公郭勛攬  
權樹黨繼而指摘宮僚非人又以星變乃主德缺  
誤所致竟忤旨罷歸方疏之入也薇謂其僕曰上  
方事玄修所忌者災眚疏上必旦暮死今以數金  
付汝買棺以殮耳命下得免隆慶初贈太常少卿  
有承啟堂稿時海鹽有三黃門咸以敢諫著張方  
洲許雲邨錢海石是也

夜集三塔山房懷玉陽頤山二丈

渺渺雲山隔幾重每於勝地憶過逢  
清吟獨對尊前月  
高坐雙攜破上峰僧到講堂時拂  
麈客來山寺驟鳴鐘  
昔年曾結束林社回首徒憐去住踪

新茶

欲向陽羨遊春雨阻行櫂  
山僧攜滿籠門前挂青笠

王滁州先生梅

梅字時魁號拓湖平湖人嘉靖壬辰進士選庶吉  
士遷刑部主事初建昌侯張延齡下獄刑官沈椿

以戚畹故不令入重獄後代者踵之事發前後提  
牢官二十四人俱擬杖而梅在其中謫判滁州卒  
於官梅才氣豪尚欲以功業文章自見惜乎未究  
其用在滁時雅抱冲淡縱情山水興會所至發為  
詩歌清深老健迥然塵垢之外可以振華啟秀噓  
枯吹生使千載下猶堪想見其人沒後五年馮祐  
山刻其遺稿

夏日與韓魯淙侍御晚遊陶氏山莊

晨與美人期出郭已遲暮  
頽陽迫崦嵫返照城陰路  
飛蓋入林樾宛轉緣溪渡  
長松冒綠蘿夜渚涵芳杜  
詞人志丘壑不以杯棊故  
欣然會意處袒據磐石坐  
月出詠而歸涼風在高樹

百步橋

百步橋下日荒荒江流無聲江草黃  
行人踟躕立古道沙鳥躑躅啼迴塘  
蒼龍沉沉彩虹偃短棹輕舟采芳卷  
月落汀洲人不歸腸斷春風穆穆溪遠

贈滁州劉文學

賣藥不受值談禪能了元林藏收穀虎座有獻花猿泛  
蟻常侵曉懸鶉或負暄漢家徵五隱早晚賁丘園

縣齋雜詠

我愛來安縣依然太古餘居人盡茅屋長吏或柴車里  
巷多絃誦山溪足畋漁疎慵更何事高枕午窓虛

寄石汀王先生二首

有引

石汀王先生按浙梅時為諸生雅承休盼斗筭黃

鍾計偕一見睽離至今風搖心旌川迴目練晤言  
未期沉憂空積觸事宣懷言無倫次聊軫疇昔俟  
諸將來耳

苦憶王夫子清時賦考槃三年不相見一札阻長安  
雪留彤管雲山照鐵冠因風泛瑤瑟情竭賞音難  
十年萊子服數口汶陽田荷篠深山裏銜杯曲水前  
春蘿搖石月夕鳥下汀烟最是論文友時時詣鄭玄

送林節推赴任瓊州

見說瓊州地烟中疊浪開遠天分島淑晴蜃結樓臺水  
館鮫人識風檣賈舶來枕椰秋樹好莫怨夜猿哀

擬欽賜日講官鮮柿詩

霜日晴酣萬顆紅金盤琥珀出深宮尚方共喜嘗新早  
講幄驚傳受賜同青簡可能慙素食瓊漿端合潤丹衷  
杜陵有客空才思寂寞櫻桃歎轉蓬

寄曹玄渚

與爾別來音信稀臨風常自動瞻依寒雲幽壑羣龍卧

斜日滄江獨鳥飛  
阜蓋屢淹鳴玉渡  
白蘋應滿釣魚磯  
何時更鼓湖東棹  
兩兩波心泛月歸

登滁州城

淮北淮南節候同  
荒臺無限北來鴻  
初懷短夢青山外  
倦倚高城夕照中  
雲樹不堪連海岱  
商歌何處起秋風  
橫塘寂寂蘋花老  
欲采寒香薦醉翁

在滁州與韓侍御魯淙卜築豐山東麓

知爾亨途久息機  
不妨高卧共巖扉  
山雲半落烏皮几



池月涼分白，  
芎衣抱病秋。  
來行樂倦，  
故人天上尺書稀。  
疎慵自缺經時略，  
浪說東南有少微。

送客

琴鶴蕭然萬里行，  
一官嶺外稱閒情。  
春風綠展柳陰厚，  
霜日紅酣荔子晴。  
賸有詩篇消日永，  
坐看鞀鼓靜嚴城。  
誰云百粵多豺虎，  
談笑胸中有甲兵。

涼州曲

記得行時約，  
言從上黨遊。  
昨傳書信至，  
三歲在涼州。

與韓侍御鎮伯同屬疾戲有此絕

韓康賣藥不知秋子晉吹笙汗漫遊可是仙人厭蓬島  
一時高卧在滁州

嵩陽山樵徐定夫

定夫字士安自號嵩陽山樵海鹽人嘉靖初布衣  
詩有風骨堪與朱陳相伯仲有蛩吟稿

憶昔行贈古松將軍

吳堤三月百花殘秣陵歸客停征鞍青山落日意不盡

尊前把袂愁相看憶昔論詩君獨好相逢何難別草草  
海燕還尋故壘飛天涯只恐音塵杳白鷺洲邊芳草青  
鳳凰臺上雲冥冥風流倘就還鄉賦寄我秦川舊釣汀

出塞

烽火三秋起天兵萬里征朔風吹勁弩沙月照團營鉦  
鼓宵連振旌旂曉更明十年腰下劍從此任橫行

宮詞

禁門秋草雨中生睡醒芙蓉小帳清幾日內庭宣喚少

紫薇花底學吹笙

趙副使伊

伊字子衡漢季子嘉靖壬辰進士授刑部主事陞  
南職方員外轉郎中人以其美呼曰小趙為人清  
直營卒不役私門郵符不假使客陞廣西副使乞  
歸三召不起日遊湖山賦詩自娛有序芳園稿

次荅京華故人詩

廿載京華絕好音故人久矣作商霖南飛曲奏人猶遠

西使書來鳥自臨青鏡數莖添白雪丹沙幾轉得黃金  
從今莫話為官在野老悠悠只醉吟

泛當湖

出門理棹即湖中竟日淹留興不窮鏡水已應歸賀監  
習池只許醉山翁深深岸柳迎人綠歷歷園葵對酒紅  
滿眼河山堪送老只今吾慕二疏風

陳同知瀚

瀚字玄海號龍嶽秀水人嘉靖甲午舉人選廉州

同知所著詩文曰求志齋言草中賦頌十數篇有  
魏晉風味其祖教諭禧有武陵倡和父給事中諮  
有湖溪遺稿皆不可見矣

龍游道中

百折龍江渺秋天放棹清山圍霜樹合灘轉石濤鳴展  
簾情何適釣簾眼獨明疎狂憂忝竊撫景愧平生

龍頭山書感

龍頭山中太可憐白沙翠竹春相鮮層空古寺出林霽

隔水小舟穿浦烟著書虞卿病不廢匡時范老憂常先  
萍踪歧路亦何意擊楫沂流悲遠天

郁主事蘭

蘭字文芳號暘川秀水人嘉靖甲午舉人選績溪  
令時有希執政指論逮胡宗憲者守以屬蘭蘭曰  
司馬有功東南奈何欲文致之得未減遷南刑部  
主事乞歸有郁比部稿

讀五代史

天地沉冥際山河戰伐中可憐長樂老只是愛三公

朱臨川佐

佐字思忠號少泉海鹽人嘉靖甲午舉人為臨川令

登硤山寺閣

翠微樓閣與雲齊石磴盤迴路不迷幽鳥忽鳴深樹裏  
好山還在曲欄西聞歌水調滄洲近入望平原落照低  
老衲莫關塵世事笑揮苔壁乞新題





樵李詩繫卷十二

欽定四庫全書

集部

楊李詩繫卷十三

詳校官侍講<sub>臣</sub>王燕緒

主事銜<sub>臣</sub>徐以坤覆勘

總校官進士<sub>臣</sub>朱 鈐

校對官編修<sub>臣</sub>蕭九成

騰錄監生<sub>臣</sub>劉亮來

欽定四庫全書

樵李詩繫卷十三

平湖沈季友編

明

沈按察宏

宏字惟遠崇德人嘉靖乙未進士授比部郎戚畹  
張氏繫獄逮諸督囚官廷杖謫壽州同知累擢廣  
西副使洞猺訐亂宏有斬馘功賜白金文綺叅政

雲南勘黔國公偽子冒襲事稱神明陞廣東按察使乞歸晚年與里中耆舊蔡典籍天錫呂州倅棟胡上猶鑰范博士栻姚別駕汝吉孫博士穀郭轉運鼎范郡幕鵬呂納言希周呂曹簿卬為真率會徜徉林圃有洛下風所著緯略類抄醫荃芹溪吟稿天文二論藏於家

遊涵山

覽勝招攜上碧岑更憑虛閣散幽襟步凌七級開香界

話徹三生見佛心  
晴日倚欄天目近  
春風拂袖翠微深  
遊朋借擬東山興  
對酒何愁乏好音

附考在崇德縣西北三十六里又名舍山寺中有塔可望吳興馬鞍諸山有龍潭五河涇水出其下舊志云山介兩州故名舍又四水涵之故名涵

石莊處士沈弘光

郡邑志載沈弘光字子懋號肖山世居平湖石莊里嘉靖間以諸生遊雍徧交海內名士會父兩山抱疴輟業東歸尋值兵荒謹持門戶常痛不及事

母見手澤必泣生平潛心理學兼精祿命伯子懋  
孝侍養歸從遊日衆公亭衣櫬屨開席講論學者  
宗之足跡不入公府按使者以幣求見不可得晚  
悟天道元氣成於貞人心愛德歸於正作愛正編  
又感里徭之弊作均平議立宗法與兩山訓戒二  
十條為世誦述申大學士贊之曰君志不用於世  
而所以效之鄉與修之家者其槩可觀矣六世孫  
季友謹識

顧書堵對月

野王堆下暮潮平九點峰頭片月生今日思君君不見

寒梅零落夜鐘聲

附考在平湖東湖上  
相傳顧野王讀書園

孫簡肅公植

植字斯立號蜃川璽之子嘉靖乙未進士選南比  
部累擢少司寇庚戌之變勅守崇文門時多其功  
拜大司寇中人王采盜伐孝陵樹邢保侵尅工匠



銀張進朝矯詔選宮嬪皆據法論罪魏國爭立事  
起下南法司獻上高新鄭方修競于徐文貞植文  
貞門人也給事王楨撫蜚語劾植奪職家居十七  
年後復薦起再疏乞休卒贈太子太保謚簡肅  
諸省文攜遊西山以病不起

聞道香山寺龍宮倚石岑泉聲來樹杪雲氣接峰陰路  
裊丹梯峻檐窺碧澗深無能陪妙躅延望發孤吟

中秋駕湖泛月

尊酒移舟笑語懽平分秋色滿江干笛聲遠度烟光冥  
鶴夢初驚夜月寒倒浸樓臺天上下斜臨竹樹影檀欒  
九霄風露清環珮縹緲飛仙接鳳鸞

沈副使鑒

鑒字大新嘉興人嘉靖乙未進士官終江西副使  
夜泊步雲橋

石井塘隈小市廛步雲橋外蓼花鮮輕橈載月隨風度  
目送冥鴻過遠天

錢太學蓼

蓼字懋仁號西泉琦長子蚤卒有詩一卷

新居

檻邊四水碧漪連竹逕花欄白晝眠莫笑西泉生計拙  
煮茶釀酒自年年

錢同知萱

萱字懋孝琦三子嘉靖乙未進士累官儀制員外  
以提調試事降德慶州同知

聞德慶命

東去三苗地青門別舊儔雲鴻秋不到山鬼晝長遊古  
樹千巖迫懸崖五月幽重看回首處春雨遍郊丘

徐通判文和

文和號蜚湖嘉興人嘉靖丁酉舉人任揚州通判  
罷歸躬督耕耘究心理學臨卒語其子曰我死皇  
極經世之學絕矣親操筭子講畢而逝所著蜚湖  
吟稿真率自恣有放翁風味

甲寅除夕避兵北郭作

身世罹多難，逡巡六十春。  
殘尊燒竹夜，孤劍避兵人。  
夢裏丹霄迥，愁中白髮新。  
因嗟城市異，涕淚欲沾巾。

午日

菰米炊黃玉，蒲根泛紫霞。  
按方惟採藥，避老不簪花。  
好雨催田急，微風入幕斜。  
騷魂招未得，擁几誦懷沙。

秋夜

山空夜靜月朦朧，一扇微涼白苧風。  
石鼎烟銷鐙影外，

竹窓人夢葉聲中

仇博士俊卿

俊卿字舜徵海鹽人嘉靖丁酉舉人官國子博士  
有海上京遊閩南淮陽華嶼瀛仙諸稿

遊仙詩

曾記逍遙絳闕東吹笙緌嶺小桃紅  
釵留內苑俄成燕帛挂枯枝盡作龍  
大地雲根風角動靈河查影月輪中  
葛陂拾得青瓊杖騎向方壺攬太空

顧舉人冀

冀字子期號少豐海鹽人嘉靖丁酉舉人有少豐稿

閨思

畫永凭闌對落花鶯啼燕舞日將斜春明門外尋芳客  
開徧荼蘼未到家

卜副使大同

大同字吉夫號監泉秀水人嘉靖戊戌進士授刑

部主事陞湖廣僉事期年羣盜屏息遷叅議有平  
苗功再遷福建副使輯備倭圖說畫戰守計閩賴  
以安弟大有大順皆進士

秋日登蘄州城

九月寒生木葉稀層城一望思依依  
自憐北闕心常在誰憶南州客未歸  
江上孤帆移遠岫天邊獨鳥帶斜暉  
何難追訪陶彭澤漫學登臨賦式微

馮教諭科



科嘉善人嘉靖間貢為教諭

泛汾湖

一片烟霏接遠洲  
千重荻葦夾中流  
飛帆欲駭雲邊雁  
擊楫猶驚水上鷗

錢太守芹

芹字懋文琦次子嘉靖戊戌進士官永州知府隆慶初求直言芹首陳崇學防海等事有泮泉集

寓京有感

陌上花光艷江邊柳色新異鄉千里夢離思一霑巾

錢太學齋

齋字懋穀琦五子讀書好客與文士屠長卿沈嘉  
則諸人友善金華吳孺子吳下王伯稠同邑姚士  
粦恒主其家飲酒賦詩有擊轅草

秋夜

寂莫逢秋夜柴門閉夕陰避人聊借病用拙得知音犬  
吠風生竹鵲驚雨入林殷勤懷舊事空負昔年心

鷹窠山

孤峰倚天碧側逕入蒼烟蠟屐還今日題詩自昔年磴  
雲生古木溜響落寒泉極目滄溟外蓬瀛一點烟

新嫁娘

蕭娘新嫁倍含羞早起粧成促下樓行到中堂紅發面  
小姑推著向前頭

雁湖釣叟王周

周號質齋嘉善人嘉靖初文學贅居秀水王江涇

以子封兵部郎中有別業於雁湖之側嘗具扁舟  
與波上下稱雁湖釣叟著自在吟二卷

晚興

林居無個事永日樂陶陶芒履青藜杖檀冠白苧袍摘  
蔬供晚酌培菊待秋醪幽興憑誰寫清吟月漸高

劉御史熠

熠字元麗號東沙海鹽人嘉靖庚子舉人官御史  
有同春堂集

贈古泉上人

花深竹石迷過客  
露冷蓮塘問遠公  
盡日苔階閒不掃  
滿園銀杏落秋風

悲妓

十六彈箏學舞笙  
蝦蟆陵下舊知名  
而今絃調還如昔  
公子相逢不肯聽

顧秀才珊

珊字子聲嘉善人

湘泉井

鑿井井泉冽黎元起頌聲寒流消渴吻清味入詩評汲  
引舒金索濈洄泛玉甕湘江發源遠佇看去時旌

附考井在嘉善縣西市運河旁嘉靖  
辛丑令谷汝喬鑿谷號湘涯故名

俞主事乾

乾字一清平湖人嘉靖甲辰進士授刑部主事時  
分宜傾夏忠愍死西市乾監刑義憤發中忽仆地  
遂乞歸衆厚贐之不受楊忠愍贈詩有直道難容

君有去孤忠自許我無生之句抵家二日卒

歸興

眼見沉寃閉九閭挂冠春盡出金門而今拂袖歸鄉曲  
不用書籤付子孫

碧蓮叟陸道乾

道乾字子勉自號碧蓮叟嘉善人嘉靖甲辰飢以  
私積散宗人後以書生赴闕上書請復祭田兩兄  
蚤世割產恤其孤又因宣公墓在忠州乞官蜀府

紀善曾刻吳山漫稿其孫輝錫集其遺文行世

過陳舜俞墓

考見  
題咏

涇上何人跨白牛  
鷺飛鷗浴共優游  
春風短調梅花笛  
夜月高酣瓠子甌  
一疏青苗天下計  
千年白簡史臣留  
篁墩舊跡存遺祀  
碧草黃雲古墓秋

彭郎中輅

輅字子殷號冲溪嘉興人嘉靖丁未進士知新淦  
縣累陞刑部郎罷歸刻志撰著有比部集其詩工



選體五七言律亦浸淫唐人風致王弼州贈詩有  
碧雲孤憶賞心人之句

行路難

醪醕美酒斗十千  
惡管清絲嬌遠天  
持杯聽曲不能飲  
志氣索漠風淒然  
荆棘蓁蓁塞歧路  
十步九躓行難前  
詩書置墻穴賈豎  
凌高賢短衣楚製  
見者喜高冠投溺  
誰為憐叔孫虎口  
力脫去兩生鴻冥  
棄如屣懸車繫馬  
卧山阿白雲英英  
滿人意

送監中琉球官生鄭氏兄弟

孤帆懸漲海萬里任歸潮  
龍女時捐珮鮫人或賣綃烟  
氛混晴雨霞色變昏朝  
島嶼過蟠木尋春一繫橈

為姬人剪綵製花燈賦

玉樹尊前起蘭缸四照通  
飛香縷綵外春色剪刀中  
淺潤非闕露穠開不待風  
餘暉如永借一玩一丰茸

追憶孫太初

生平落魄是潛夫袖拂烟林五嶽圖  
海上碧雲看不斷

墓前明月意同孤  
葛翁去住餘  
丹竈阮籍浮沉只  
酒壚  
問爾吟魂春雨外  
時應飛鶴過西湖

寄沈純甫時以上書戍廣

五嶺沙飛碧海潮  
孤臣腸斷隔丹霄  
知心半紙無來雁  
改面同門盡挿貂  
炎徼鬱蒸椰子瘴  
春祠紛舞竹郎驕  
思家莫把刀環咏  
騰月茅龍夢不遙

湖上新築釣鰲磯

高臺春滿碧江邨  
一片風烟接海門  
鰲氣半侵雲壑溟

釣絲乍捲雪濤奔三山捧出芙蓉劒五馬閒閒桂子樽  
却笑蟠溪垂白老何如年少是王孫

附考磯在嘉興南湖  
隆慶中兵憲沈燧築

陸莊簡公光祖

光祖字與繩號五臺平湖人十七舉於鄉丁未成  
進士授濬令內鄉王奪民田封丘王蒼頭私販皆  
置之法有盧柟者富而才前令誣以重辟光祖白  
其冤釋之擢祠祭主事累轉文選郎汰黜不少假

科臣孫丕揚劾其專擅落職陞辭揖孫曰承公教殊荷相成但吏部之門干謁錯至苟非自行其意何由秉公孫沉思良久憮然謝過即日自劾失言力薦光祖光祖亦復起歷太常太僕大理諸卿晉工部侍郎張居正秉政奪情後益自恣光祖貽書規諷居正故同年友善然與議政輒相左及論折漕事不合御史張一鯤希指論劾遂求去居正沒起為少宰會議居正獄光祖曰江陵專權非弄權

也且擁護功亦安可泯然衆欲文致之惡其異出  
遷南司空越三年晉大司寇拜冢宰先是上已列  
名御屏書清正二字至是喜曰此昔破韡郎也時  
銓部事柄旁落光祖始振刷不復闕謁政府一切  
中涓請托拒不納特簡清節者許孚遠顧憲成等  
二十一人搜剔臺省諸蠹蘭溪新建出中旨大拜  
光祖以故事爭之即疏陳祖制會推必不可廢報  
可初趙少宰用賢沈司馬思孝每廷論面辱光祖

光祖折節不校久之少宰語人曰吾乃為平湖所容司馬家居扼腕時政每嘆曰持公議而不以愛憎奪者平湖一人而已其為人允服如此乞歸五年而卒卒之夕海上星隕如斗擊地有聲謚莊簡光祖歷仕三朝國家大政大議一言立定按尚論錄載三太宰首莊簡次孫清簡次陳恭定云攬久頓之轡振積衰之氣比諸唐姚崇宋韓琦洵不誣也

贈周居士

散髮仍高坐，狂吟復倚楹。  
官貧休問業，身老不求名。  
早獻長楊賦，曾觀細柳營。  
壯圖今落莫，秋至獨關情。

彭城

大樹蕭蕭起暮風，君王不復渡江東。  
殘霞滿地生新草，過客沿溪問舊宮。  
鐵騎八千冰乍合，咸陽三月火猶紅。  
英雄轉闕無完策，四面悲歌入帳中。

同遊瑯琊寺次孟兩峰韻



小亭巖畔轉深幽，試挈壺觴結伴遊。  
林靜屢聞紅葉落，溪深時見白雲流。  
坐無絲竹供賓醉，袖有烟霞引客留。  
忽枉小山招隱句，叢生桂樹正宜秋。

李僉事儒烈

儒烈字子忠，海鹽人。景孟曾孫。嘉靖丁未進士官  
閩憲，有見川集。

雨懷

水影隨波動大浸，欲稽天前丘兩樹。  
花帶雨空自妍，忽

忽垂玉筴悠悠撫青編悶懷誰與排臨酒徒茫然

雲陽道人郁從周

從周字泰初秀水人神骨清異喜吟咏善鼓琴舉  
嘉靖己酉鄉薦再上春官不第即棄去瓢衲出遊  
或數年一歸省其母嘗至南嶽遇異人有所指授  
後遇張紫陽授大丹訣要或賣藥武林市中人無  
識者萬曆壬午春與諸道侶期往建昌煉丹藥一  
日忽云吾塵劫已滿當去矣遂逝有詩賦一卷人

稱雲陽先生

風光樓

白雲護招提帝子逃禪處鐘聲雜笙簧玄跡埋烟霧井  
邑多囂諠物外還成趣寧知巖壑水不為空山住一朝  
驚長安四海相馳騫千年王氣間溪流自朝暮岸芷青  
未已樓閣空軒翥遺芬渺難攀歲宴勞予顧寥寥徒慨  
吟杳杳猶懷故龍光自消歇寂寞芸窗雨

馮參政臯謨

臯謨字明卿號豐陽海鹽人嘉靖庚戌進士由刑部郎擢江西僉事時嚴嵩舍中兒多忤勢不法臯謨捕笞嵩銜之會廣中倭夷海寇與洞賊並發而大盜張璉復反遂陞臯謨廣東僉事臯謨乃招服海寇王伯宣等詭為倭裝夜駕輕艘疾至三河布蒺藜令人登山發哨吹笳倭驚竄死大半乃集水陸師於廣州分七哨進攻張璉戰於大埔擒之僅擢福建叅政以外艱歸言官又希嵩風旨論廣事

無功奪職林居三十年築白鶴園於管山有集十

二卷

宿荆山悟空寺

野客聊乘秋興餘白雲重訪舊禪廬  
溪邊路失衝泥後谷口寒生入夜初  
清供蕪檀茶未熟幽篁匝逕葉全疎  
來遊悟得空門意一笑浮生萬事虛

附考寺在海鹽西南  
四十五里荆山上

暮春宿覺林寺

幽棲何處不安禪  
夏耳潺湲漱石泉  
寺裏春風當浴罷  
雨中山色屬尊前  
林深舊業埋芳逕  
僧去空堂鎖斷烟  
十載放歌憑兩屐  
一龕長共白雲眠

寧海寺

踏遍青山不問名  
魚天沙岸雨初晴  
停橈月向松間落  
借榻雲從海面生  
詩到上方俱入悟  
客逢高衲更多情  
獨予伏枕春風後  
薜荔空裁野服成

附考寺在海鹽西  
南二十五里宋建

宿石屋山寺

青天萬仞插孤峰，迴合珠林翠幾重。  
秋去夕陽飛葉墮，客來清夜老僧逢。  
雲銜佛閣金鋪暝，山蹙仙壇石髓封。  
聽法欲尋龍起處，滿空寒籟夾疎鐘。

附考山在海鹽縣西南三十六里，上有石壘，舊傳氏避黃巢于此，山下有黃巢街。

高學博見枉分韻

一甌遠寄海天涯，遣興時過處士家。  
瓜熟儘堪分五色，詩成那敢說三叉。  
溪雲夜蕩漁磯月，籬舍秋殘槿樹花。

野外不嫌供具薄鄰家春釀尚堪賒

胡主事憲仲

憲仲字文徵海鹽人嘉靖庚戌進士授工部主事  
庚戌犯京之變條陳十劄部曹偉其論俾督造兵  
械協巡九門轉南刑部主事時倭擾浙中仲貽書  
帥臣言備倭三策皆大驗卒於官仲廣穎高準負  
氣多膂力憤時嫉事輒眦裂髮指勇往不顧著有  
仰崖集宗子相吳明卿徐子與梁公實俱有贈胡



文徵之金陵詩

折柳送屠石屋年丈

長楊夾道如青雨故故搖風別離處會得垂條偏惹愁  
判折一枝贈君去君去江南正暮春遠烟殘月暗河津  
寧知此地還傷別歷亂鶯聲愁殺人

魯橋寄懷

黃塵白雨此征衫愁到春深祇自緘魯地雪環拖練水  
吳山雲鎖讀書巖草腥去路爭嘶馬風軟歸舟遠疊帆

愛殺青青河畔柳  
撩人一路晚摻摻

出師曲

內宅兒元騎射同  
帳前偏著茜衣紅  
沙深雪遠迷番馬  
月滿中天掛漢弓

劍津子鍾夏

夏字時叔梁次子生時梁夢神指宅畔水曰昔延  
平二劍埋此一劍化龍一劍還有十丈遂號夏為  
劍津子以太學生授貴溪丞未三月歸嘗客白下

名士畢集咏虞美人花一時避席有劔津集其詩  
清婉雅麗多佳句

素扇行

蜀王府中製奇扇鏤邊飾寶泥金面龍函捧獻明光宮  
賜之彩幣兼華宴來往星馳驛騎勞祇錫才人最恩眷  
吳門巧作素白良欺霜如月凝輝光圖山寫石各工意  
八分草聖爭誇長後有文翰林前有祝京兆二老相持  
稱墨妙文翁二子頗克紹邇來幼海周山人太倉王郎

賢縉紳操觚往往宗晉法揮灑不與庸流鄰君不見六  
月城西古寺中涼風到處綠陰濃山僧笑指乘驄客汗  
濕紗衣日幾重

贈馮秋野

我愛馮秋野觀詩解鵲鴿一尊秋露白數筆遠山青澹  
泊心如水飄飄鬢欲星長生如可得真訣在黃庭

夜宿舟中

野店烟光碧陂塘草色青客舟維古岸漁火亂春星夜

靜愁難遣風微酒易醒一宵孤枕上流水自泠泠

歸舟

琴書隔歲生行色三月終旬始拂衣遙憶南園花欲盡  
已輸東閣燕先歸山連曉騎穿雲度潮落春帆帶雨飛  
白晝嚴陵灘上過野鷗相見亦忘機

和楊薇園暮春見寄

宴息清齋簾半垂寂寥心事少人知漫憐海燕成巢日  
正是林花落地時每帶青錢因嗜酒早生白髮為攻詩

相思况復當春暮  
莫向東風折柳枝

愛妾換馬

曲房初遣翠娥眉  
延廡新歸碧玉蹄  
寶鐙想鎔金壓鬢  
繡繡應製錦障泥  
策來縱擬臨池舞  
別去那堪對鏡啼  
異日揚鞭經過處  
蘼蕪春晚綠萋萋

春興

朱簾高捲燕來飛  
乘興難將淑景違  
楚館月明調夜瑟  
越羅風細剪春衣  
花飛金谷人何在  
草沒銅駝事已非

欲向山林訪遺逸綠楊深處有漁磯

咏虞美人花

劍血纖纖玉帳傾庭花猶帶美人名春風不解興亡恨  
故向江東處處生

陶推官廷錦

廷錦字晉溪秀水人嘉靖壬子舉人歷饒韶二府  
司李

遊岳麓

野航泛輕雲岡巒翠欲滴撫景聽秋噫大荒白日寂樓  
虛突兀扶桑東龍鱗樹浮蔚藍空夕陽倒影流玉虹孤  
光澹蕩山冥擘玄夷惚恍護禹碑攀躋絕巘弔湘纍迴  
風颭颭天末起俯視吳楚青巖甍斯須月上搖垠堦人  
帶晚霞歸渡遲

姚侍郎弘謨

弘謨字繼文號禹門秀水人嘉靖癸丑進士選庶  
吉士授編修壬戌分校內閣袁煒意有所易謨力



爭袁銜之遂左遷其後一視學兩為司成所拔多  
名士終吏部侍郎贈禮部尚書有寶綸閣集

齋坐喜燕至

齋閣蕭閒坐迴翔海燕輕銜泥尋舊跡挾子試新聲並  
剪深花入雙棲曉夢清紫宮幽密處得意豈無情

南湖喜雨

高齋靜掩白雲封竹樹蕭蕭翠幾重雷雨忽令移大陸  
江湖誰為起飛龍樓臺遠映烟波濶城郭遙含暮靄濃

丘壑主恩容自老使君風雅得相從

呂泰興炯

炯字心文崇德人嘉靖乙卯舉人選泰興令不兩  
月告歸

歸田

吾本語溪人稍嫻農家務桑麻翁如林春深足蠶布  
田雖薄收料理免饑餓稚子候我還野老復相顧謂予  
千五斗誤此去鄉故南山空自青誰與對朝暮及今巾

車歸嘯咏不相負

梅花東老朱愚

愚字汝明嘉善人嘉靖乙卯貢授魯府教授歸隱  
植梅數株自號梅花東老日嘯咏其下有東齋遺  
稿

梅道人墓

問幽憑杖履鶴化只蒼枝高樹猶喧鳥殘陽有斷碑神  
飛名在墓情到石留詩千載梅花夢春風細草知

胥山

畫船蕭鼓振山靈  
伍子無碑陸有銘  
寒食古今多涕淚  
春風花柳半飄零  
重泉不照深杯月  
怪石空遺老劍星  
慷慨峰頭歌一曲  
遊人爭倚醉中聽

獻山仰高亭秋眺用八音冠

金鰲峰頂試春袍  
石磴雲梯步步勞  
絲奏五絃虞氣象  
竹開三徑晉英豪  
匏形俯視滄溟小  
土力終成泰華高  
革豹有懷天咫尺  
木樨花發已多遭

附考在嘉善學宮後明弘治中

劉令疊土為山上有仰高亭

景德八詠

考見二卷

幽澗泉

昔聞神女降鑿出靈泉異一勺何清泠惠山可同志

大悲閣

高閣湛虛明一心照千佛本向西方來不隨西日沒

蘿屋月

青山在屋上碧蘿曉明月照見屋下人浮生落秋葉

竹爐烟

活火煎活水日夕沸空聞客來且喫茶坐煖瀟湘雲

雨花臺

忽散瑤臺雨天花世所奇山人無結習清淨守寒飢

翻經室

一室斗來大退藏聊洗心楞嚴有秘旨披覽極幽尋

洗鉢池

齋餘散禪慮悅靜不聞鐘持鉢臨流洗有時驚卧龍

補衲亭

老衲密密縫百結煩千辛已交木上坐不染世間塵

卞主事錫

錫字叔孝嘉善人官吏部主事

鶴湖

湛湛秋湖一鑑空羽衣玄鶴跨仙童翱翔健翮凌霄碧  
瑩徹芳塘浴日紅萬派奔騰天上下數聲嘹唳海西東  
主人對此心飄邈高節清風孰與同

陸提學光祚

光祚字與培號湛庵光祖弟嘉靖乙未進士授兵部主事後補禮部歷三司建明皆闕大體隆慶間屢疏忤當路出為湖廣副使轉陝西提學卒官生平清亮淳樸所生母亡故事無去官持服者光祚以請報可有湛庵遺稿

登望湖亭

亭標望湖好風日似春和白雪融青嶂紅霞映紫波天



空羣雁度山靜一僧過頓覺塵襟滌悠然發浩歌

沈副使啟原

啟原字道原一字道初號霓川謚之子嘉靖己未  
進士仕至山東憲副時邑有倭警之軍興捐千金  
佐之著有鸚園近草巢雲館詩紀

飲烟雨樓

晴雲高捧五驂騑落日蒹葭宿靄收水鏡涵空天上下  
冰壺倒影月沉浮歌翻別調侵寒漏飲帶餘酣漱晚流

符竹不妨兼吏隱使君佳興在南樓

登本覺寺追次蘓韻

支公駐錫此祇林  
薜剝殘碑尚可尋  
三過音塵俱是幻  
當年世故總成今  
談經却憶蓮華舌  
卜隱長懷薜荔心  
徙倚清暉忘去住  
滿庭花雨正秋深

張布衣守約

守約號梅村秀水芝溪人不事詩書以耕桑為業  
耽心禪理有得輒能吟咏陸莊簡與之交有和寒

山詩一卷嚴滄浪云詩有別才于梅村信之

和山居詩二首

遁居霞霧峰千山萬山裏白雲傍榻飛草閣依巖起閒  
卧擁鹿裘清談揮麈尾童子採茶歸自去汲泉水

山空宿鳥鳴磴道卧松影凉月夜淒淒明河秋耿耿長  
歌復短吟來往無人境疎鬢不堪搔絺衣風露冷

徐推官元春

元春字殷仲號鶴山嘉興人嘉靖間官節推

登紫薇山

危峰獨上有餘情  
蒼藹微茫入望生  
山勢直從秦嶺斷  
溪流遙接越江清  
滿林落日啼玄豹  
幾樹新聲變早鶯  
咫尺空餘堪隱地  
自慙猶未解塵纓

曾教諭丙

丙字文光號南湖秀水人  
嘉靖間貢官南靖教諭  
有隨遇集

署中種花

客路三千到海涯  
誅茅編竹自成家  
亦知奇字無人問  
儘日拋書學種花

沈署丞啟南

啟南字道明  
啟原弟以貲授光祿署丞  
有溪居草

雨坐

病懷愁緒兩茫然  
風雨連朝更可憐  
獨坐匡牀聽不得  
一壺茗色亂蘿烟

吳省祭宗漢

宗漢字守忠一字天章號東滙海鹽人嘉靖間省  
祭官詩甚清麗有心逸道人吟稿

雨中赴飲

烟雲漠漠近黃昏  
門徑苔深印屐痕  
滄海座中山帶郭  
鵝鳩聲裏雨連村  
秋風落葉仍愁鬢  
長笛當樓欲斷魂  
狂客頻來君莫笑  
山公曾醉習家園

題扇

歸鴻遙帶夕陽飛  
孤磬千峰野色微  
閒對白雲成坐久

不知空翠濕秋衣

雨中

卧聽黃梅三日雨  
小池青草亂鳴蛙  
朝來還倚柴門立  
落盡牆東梓樹花

題畫

溪邊木槿統門栽  
窻下楸枰向午開  
忽隔秋雲吠山犬  
抱琴誰過石砭來

聞秀才華卿

華卿字舜甫號南白錢塘人父贅海鹽因家焉嘉  
靖中遊邑庠有南白外編

社日待燕

積雨逢新社巢空燕未歸  
豈應寒尚阻還是濕慵飛  
欲踐秋前約徒開柳下扉  
花纔徧朱雀巷莫認烏衣

朱貢士觀

觀字國賓號苧川海鹽人貢士

客杭作



千里勞勞京國夢頻年寂寂武林思此身落葉還相似  
歸興黃花正及時眼底何人酬駿骨愁中有客寄烏絲  
月明湖上秋將滿憔悴青袍豈得知

長水先生沈懋孝

懋孝字幼真號晴峰學者稱長水先生平湖人嘉  
靖壬戌進士選庶吉士授編脩陞修撰遷南司業  
時史臣貴不離局呼司業為嫁老女至南益厭薄  
之懋孝淡如也尋以壬午主考南京中式王少方

係故相江陵戚中蜚語謫判兩淮投牒不赴李維  
楨孫植皆為白寃懋孝無一言辨退居淇林之上  
授徒講學晚歲產益落庭戶蕭然擁書萬卷日丹  
黃其間寒暑不輟故博洽近代無比每有乞其文  
者輒引紙疾書不經思索不加點竄視其紙之長  
短必竟幅乃已著有滴露洛誦石林四餘賁園水  
雲諸編論者謂其文神超骨秀如秋濤曉月詩集  
十卷名淇林雅永其論詩不拘繩尺以雅為宗務

絕近代淫哇之習雖當七子主盟而能不染其膚  
廓語于鱗亦謂幻真之詩特暢于情但閱其全帙  
每多誤入他人舊作蓋詩刻於沒後後人不暇深  
考盡取老人所手錄者貿然授梓耳予今特存其  
有可信者若干首雖佳篇盈簡未敢輒登湮沒之  
咎誰實司之可悼也夫

石莊小隱

柴門臨水豆花蹊小汲攜筒自灌畦茅舍幾家村落裏

林田三頃柘湖西斜陽紫翠多深秀秋晚風烟正慘悽  
一領布袍先補綻任他風雨只低棲

附考莊在平湖東泖元石都尉之賜莊有石田飼  
鶴并石總管廟嘗探出碑版為學士歐陽玄筆

新立釣磯於泖上

玄草空餘字崛竒朱輪隔絕路逶迤能尋白社看蓮葉  
唯對青山賦竹枝行探鳥巢來北塢閒驅繭犢又東陂  
滄江一任愚公釣聊寫情言答所思

淇林

春來頻過林西館  
淇水青青亦耐看  
小牖鳴琴聲自古  
濃陰散帙影猶寒  
掃空舊憶曾千畝  
起蟄新添恰萬竿  
時奉輕輿遊泖上也  
須詞賦擬潘安

中丞金省吾年兄顧我當湖感舊述懷二首

不見風神三十年  
入門相對各蒼然  
藤蓑一枕忘余老  
竹簡千秋獨爾傳  
壯日襟期曾許國  
浮雲世路總關天  
丈人才力猶雄否  
早晚徵書出御筵

問我山居何所為  
灌園雅有漢陰渠  
雲飛隴上時慙鳥

月滿磯頭學釣魚，貧似截蒲常作賦。  
力能揮草或成書，只今經略推簫管。  
自哂迂疎百不如。

送明懷叔之任鄖陽二首

星分翼軫蜀山橫，漢水茫茫錫穴城。  
白馬巖前千樹出，青羊澗道五雲迎。  
三方地局連秦晉，百疊河關控豫荆。  
自有生平宏略在，丈夫隨地起勲名。

萬山蒼翠午雲齊，沮澤縈迴繞大堤。  
苦竹叢烟鄖口處，鷓鴣啼月穆陵西。  
瀟湘不少吾誰侶，琴酒尋常自可攜。

二十七峰羅宇下會朝郡邸楚天低

古意

落花天氣春餘幾垂柳青青日又曛  
深立繡簾人不見輕風吹動鬱金裙

竹枝詞

洞庭秋水接三江正美鱸魚橘柚香  
煞管家家明月夜儂今何事不還鄉

答本寧書問

我在中林嘆索居故人寄我下江魚就中一片相思意  
帶得三行感事書

家園十咏之二

有序

三泖碧湖之隈石莊古里家園在焉我大父兩公  
所築也公少有誼槩晚乃留神玄理自比天之放民  
不降不辱老而愈厲故名其堂曰逸民堂之前卷蓬  
延檻三面施青簾雜花相映堂後有池池前有山大  
父與客彈棋軒上遇日高微酡撫檻喚魚魚聞聲而



至由後山過小石梁入歸雲洞洞中多巧石四壁森  
映登山頂有美人抱獅峯甚雄奇竝此可望三泖從  
西北繞出山之背多青松碧梧過此又一衡門曰琅  
玕塢有竹三萬竿雷行雨過新梢出雲每賦詩勒節  
間如云泉聲帶月鳴秋夜竹影拖烟弄晚風又云竹  
林數子真吾黨頭白無能了此生竹旁雙渠相灌列  
百畦甘瓜香芹之屬時摘鮮甲以供客由此出東圃  
門有紫桂百枝桂前有池種碧蓮花故詩有素蕖含

露出清瀾之句池上有來青亭其前又有梅花塢  
菊塢故詩曰青草小航尋粟里黃昏淡月到林家  
由此入東廊至小可軒大父團蒲所也自倭變以來  
林泉竹樹荒蕪盡矣而山之石累累存者十之三因  
憶往事泣然流涕姑記其畧云

來青樓

樓外蓬萊十二重開簾不隔翠芙蓉主人樓上橫看處  
恰似天台面面峰

萬竹房

唯將疎影邀明月  
那用長絲釣巨魚  
夢餘記得三天字  
來向琅玕節上書

聽絃者

忽聽指下語  
錚錚似背殘燈對月明  
夜半十年心上事  
沾裳爭奈子絃聲

鄭光祿履淳

履淳字叔初  
端簡公長子  
嘉靖壬戌進士  
隆慶初

授比部郎改尚寶丞時羣小雜進淳不勝憤上書  
切論上怒榜之百繫獄踰年釋為民神宗登極復  
官擢光祿少卿有少卿集靜志居詩話云光祿受  
杖血袴至今藏其故宅

春閨

朝來靈鵲繞簷鳴果得雲牋慰遠情但說別來長見憶  
歸期依舊舊不分明

孫訓導肯堂

肯堂字以升海鹽人官鄱陽訓

秋夜

人靜柴荆僻玉露何瀼瀼微雲散欲盡衆星搖寒芒秋  
風忽四起悄然生新涼

沈秀才維鉉

維鉉字雲涯平湖人嘉靖間文學

北墅

紅橋出水涯十里北塘賒邨逕通商舶烟波繫釣槎竹

支茶竈穩柳護酒旗斜况近讀書處時來得看花

林教授雨

雨字少巖桂子居海畔倭亂力耕自食嘉靖甲寅  
以明經授代府教授

亂後感春

古道草如茵蕭蕭已暮春斷紅留蛺蝶殘碧卧麒麟風  
雨啼新鬼鶯花憶故人那堪談往事雙淚落荆榛

馮叅政敏功

敏功字元卿號小山汝弼長子嘉靖壬戌進士以  
儀郎歷副使備兵徐州時河決睢寧六百里功經  
理水道築堤禦患皆可為法晉河南叅政後復督  
漕於淮寶應等三湖舟多覆沒因疏越河通之益  
自勞瘁疾大作囑同官曰越河誠利國然太逼湖  
幸別勗堤護之顧其子伯禮曰吾死有賻歸之官  
以佐堤聞者悲之贈太僕卿

烟雨樓

南湖烟景屬高樓樓下波光接素秋江郭雨餘翻夕照  
島門月上湧寒流共看遺跡千年勝似泛虛槎八月浮  
此夜好乘玄鶴去冷然不覺下滄洲

戚尚寶元佐

元佐字希仲號中嶽秀水人嘉靖壬戌進士初仕  
儀曹會穆宗登極諸典禮多所匡益宗藩一疏尤  
見碩畫陞尚寶卿告歸居家廉靜不為請謁善楷  
法與文徵仲顏頤畫祖巨然筆力蒼勁後以苦吟



致疾卒詩極秀穎兄事吳徐弟畜宗梁非誣也著  
有青藜閣集

早朝侍內殿班先入中右門待漏

鳳掖傳呼早晨趨  
逼禁闌天香浮輦靜  
宮漏隔花微仙  
掌明河動周廬列宿  
稀不知風露重先濕  
侍臣衣

題天寧法舟禪堂

卓錫幾年至松燈一  
草庵榻虛雲共住定  
起鳥來叅毘  
衲人間相蓮文世外  
談平生玄寂意長此  
對瞿曇

鞏華城早朝先駕戒行有述

鞏華晴散紫宸朝  
曉度春風威漠橋

世宗所題橋名

花映前茅

仙蹕引日臨左肅  
玉驄驕山迴御氣  
雲中轉鑪裊天香  
林外飄六尚才人  
都後乘綵霞深處  
擁笙韶

寄吳君澤中丞

上都開府近皇州  
共嘆頻年節鉞留  
三箭令傳紅石夜  
五營饒合白羊秋  
名王款塞垂橐入  
塞馬來庭給印收  
中國聖人全務德  
不須身拜義陽侯

真如擊竹山房

香臺畫鎖白雲深化塔層層出紺林自拂朝衣耽獨卧  
每教道侶數相尋三天虛寂非人界十地莊嚴盡佛心  
記得廿年前事否月明如水幾登臨

西林寺

虛臺斜枕白茅岡沉雨陰蘿蔽夕廊寂寞望中烟樹暝  
空餘一縷佛前香

京師上元詞二首

月滿天街香霧飄  
燈樓歌吹咽春宵  
自來都下傳遺俗  
一片新粧出走橋

火樹光搖照九衢  
粧成百寶錯流蘓  
春官自有文皇典  
每至元宵請大酺

春日

綺閣香籠繞碧紗  
夢回亭午試新茶  
湘簾半捲微風起  
花汗屏前玉辟邪

送人入蜀

西看白帝亂雲間  
少小離家老未還  
三峽夜猿聽不得  
如何又有萬重山

春日同戴將軍送柴子開

立馬章臺酒數巡  
柳條空自裊殘春  
花前獨有羌童侍  
學得吳歌送越人

項上林元淇

元淇字子瞻號少嶽秀水人性狷介工詩善書與  
弟元汴並名於時嘉靖中以貲為上林監著有少

嶽山人集皇甫司勳汙稱之曰古選冲逸陶謝亞也五言典雅王孟流也七言清婉錢郎匹也人以為知言

東園秋霽同諸弟攜尊眺賞

誕嫚予成癖清狂爾較深言同池上酌來聽竹間琴水氣澄荷檻秋陰抱石林涼風一披拂竟日懶衣簪

月堂夜坐

絕磴出雲危虛堂向晚披竹開留客徑樹翦礙山枝海

月當窓倚湖帆俯鏡窺投簪屬清曠永夜不知疲

泊長水故園值春盡諸友攜觴命韻得來字

言從長水洙行翦故山萊鳥有相求樂人今不速來夏  
陰先灌木春色尚餘杯九里樵風便輕舟暮可迴

贈陰三嘉判官致政歸嘉州

矯矯獨行辭巧宦冥冥霄漢羨飛鴻蛾眉萬疊岷江外  
劒閣千尋棧路中曉澗翠迷邛竹雨春城香散海棠風

圓經云嘉州  
海棠有香

憑君為語狂歌者棲隱於今鳳德同

初夏汎南河遵螺潭庵放舟花莊池館作

日長風暖柳花新  
引興揚舲野水濱  
飛燕掠波如識我  
游魚吹藻忽驚人  
林間池館要山簡  
物外禪棲遲許詢  
且共流連休遽返  
酒杯湖月正相親

江上望潮不至戲作竹枝

郎君南埧妾北湄  
早潮望到晚潮時  
浙江潮信有時失  
郎約何時可定期

墨林山人項元汴



元汴字子京號墨林山人嘉靖時布衣博物嗜古  
精繪事好蓄書畫及鼎彝尊壺琴硯玉器之屬不  
惜重資購取時人多艷稱項三麻子云

龍淵秋集同子瞻兄陳子忠分得天字

疎林繚繞帶龍淵三徑悠然接野田秋水不流明似練  
晚峰相並削成蓮雲窓石几揮毫裏竹色松陰展簾前  
頻會莫驚星聚夜一尊聊醉菊花天

石佛寺

山居偶逐白雲過遊戲臨窻筆墨多却愧山陰王逸少  
遠公不惜聽經鵝

附考在嘉興東南二十七  
里唐獲四石佛寺因名

張布衣服采

服采嘉興人

訪少岳隱居桃花里

欲覓柴桑處士家城南十里碧溪斜武陵不隔人間世  
暮雨新流泛落花

張副使應治

應治字體徵號冲泉秀水人嘉靖壬戌進士任行人擢南戶科給事疏請正宮闈劾遣巨璫邢保革南司禮監神帛及論輔臣冒恩偽濫皆人所不敢言已復抗章論新鄭出為九江守陞臨清副使卒官著有奏疏及玄陽堂稿

憇四祖禪寺得太室詩於石壁和之

玉液瀑巉崖琪花拂幽徑颯然萬木驚山堂一聲磬

偶題

風裏飛花高復低半飄茵席半沾泥春光搖落渾無主  
腸斷流鶯恰恰啼

沈大理玄華

玄華字邃伯一作端伯號少河秀水人嘉靖壬戌  
進士少嗜學不事家人產登第後閉戶讀書性善  
飲左持觴右執卷丙夜不輟為人謙厚口不作雌  
黃仕至大理卿先是為禮曹時使朝鮮朝鮮贈以

金絲帳却之後為尚寶上欲採玉華極諫得寢著  
有竹葉軒稿其詩與彭比部一派亦多佳作

萬壽節早直會極門

鳳掖傳呼入金門遇直時爐香浮鎖動宮漏出花遲玉  
帛陳王會旂常壯羽儀乍來供奉列應起肅雍思

贈朱山人

海嶽三峰下青蘿白髮翁烟霞分世外瑤草託山中放  
浪真為達逍遙不諱窮丹砂能鑄骨何必訪崆峒

古崖觀堂

坐久老僧出松壇盡日閒數聲啼雨鳥一片隔江山花  
馥譚經所雲封入定闌倦思支遁馬薄莫借乘還

咎鍊師芝房

園丘地接碧霞居寂掩玄闕白日虛丹竈埋雲流紫火  
真符堆案散天書盈尊舊識麻姑醴望氣疑來函谷車  
自是過逢多道侶星壇咫尺即華胥

集姚玄嶽玄覽堂

芳堤弭棹來賓從細柳陰中啟石門幾處樓臺遙帶郭  
一叢花竹半成村直將流水為詞賦更借啼鶯侑酒尊  
盡道德星今夕聚如何明月在西園

王叅議錫命

錫命字予卿號文泉秀水聞川人嘉靖壬戌進士  
授刑部主事陞江西叅議以母病告歸絕意祿仕  
與二三老友倡酬詩亦蕭散有蔣光閣草

同明卿訪仲佩王孫夜話

誰知帝者裔別有烟霞姿問字不載酒談經能解頤樓  
高仍對竹山靜且臨池清夜但安坐涼風生露葵

酬林從吾年丈

頗怪幽棲者偏憐浪跡人耽詩翻是癖縱酒未嫌貧芋  
栗山租足魚蝦水饌新向來梅徑畔應與鶴相親

王參政倖

倖字廉甫號會泉周之子嘉靖壬戌進士授武庫  
主事海寇曾一本跳梁閩廣司馬劉燾督兵倖叅



其軍凱旋進郎中轉武選會以馬市議忤江陵意  
出守永州歷陞江西叅政

秋日過友人村居

林中把臂日頻斜濁酒枯魚意自嘉  
易受霜侵惟綠鬢  
強隨人意是黃花  
門題凡鳥嵇康宅座有高僧  
許掾家  
愧我坐酣無好句多君賦擅赤城霞

陳潛山九德

九德字子吉初字子忠號仰觀秀水人嘉靖甲子

舉人授潛山令有集行世句亦清警

鞦杯歌

有序

予昔遊燕得一鞦杯藏篋中偶黎趙二文學見訪  
出以代觴各談艷麗戲作長歌不覺間情之露云  
昔讀陳王洛神賦每懷裔裔凌波步今來貯酒作飛觴  
倚醉凝眸重回顧想見雲中一翠蛾遙從洛浦暫經過  
偏宜花底裙拖錦更稱風前襪映羅風前花底常相見  
雙宿雙飛誰不羨日暖鶯啼二月天女郎連袂出江邊

隊隊分場爭踴蹴翩翩拂架戲鞦韆未誇裊裊枝頭柳  
先鬪纖纖足下蓮彎弓窄小誰能匹江北江南嗟獨立  
嬈媚俯仰若有神婀娜趨蹌似無力遮莫楚王進細腰  
一鈎拾級騁輕躋翠盤幻出盈盈態錦帳移來步步嬌  
行行步步香霞裏稱觴上壽天顏喜歌舞淹留玳瑁筵  
春陽暗擲度流年昔時稱觴人已去空留脫屣向人傳  
傳觴至我真堪賞飛燕翩跹如入掌杯傾鸚鵡莫辭頻  
杓奉鸛鷀日數巡遺韻未銷芳徑跡餘香猶印落花塵

但能酩酊判長醉絕勝尊前對玉人

西湖詞二首

西湖日落鏡光斜少女新粧似浣紗乘却蘭舟蕩蘭桡  
約開蓮葉採蓮花

湖上家人帶夕暉野鷗相對亦忘機微風不動波澄碧  
水底青林開竹扉

夜泊駕湖憶舊二首

淒然風景正孤清忽憶當年問水情半夜吳舫勞玉指

梅花零落秀州城

白蘋花上苦相思紅蓼汀前憶酒卮  
若箇指頭權作板輕彈竹几度新詞

錢舉人與映

與映字淵甫號魯南薇之子嘉靖甲子舉人有詩  
一卷屠隆序之

寄吳少君

幽意有誰似僑居也竹林有時忘獨坐閒亦賞微吟  
劒

冷磨前事瓢懸破後心相思無一寄春水到門深

懶翁駱驤

驤字子龍號復齋嘉興長水鄉人嘉靖中布衣年  
三十始讀書博通經史好吟咏同時范國博言彭  
比部輅項上林元淇皆其唱和友也驤善畫工醫  
晚與天寧濟公精嚴澤公為方外交精心禪理謝  
絕世緣更號懶翁作懶翁歌以見志郡丞陳南棠  
欽其人造廬請見出慕陶真趣卷乞題驤有句云

日涉園林總成趣  
遠公社裏莫相尋  
人皆稱其高  
致云著有言志集

烟雨亭

曲檻浮青靄  
荒堦蘚跡深  
雲歸滋亂石  
鳥靜轉空林  
坐怯草衣冷  
書貪竹几陰  
泉聲與山色  
并作晚來吟

漫興

園林雨足綠陰肥  
風靜茅堂乳燕飛  
睡起不知春又晚  
籬間花事到薔薇

溪上

竹樹參差映碧紗  
槿籬茅屋兩三家  
前溪一望人烟少  
水鳥雙飛上釣槎

仲舍人春龍

春龍字原仁秀水人嘉靖間太學生授文淵閣中  
書舍人最善楷書亦工詩文與李先芳莫如  
忠善王弇州亦稱其詩雅尚在襄陽右丞間才具  
微短有九山樵子集



嬌娃篇為某氏賦

萬花堆裏春風窟錦樣流光莫虛擲繡地朝敷連理枝  
畫堂夜語單棲翼別有飛樓結半天珊瑚鈎控水晶簾  
流蘓疊疊鮮花帖帳額盈盈明月懸鮮花明月春偏好  
二八嬌娃名小小弱態偏隨乳燕輕芳年恰比流鶯早  
乳燕流鶯浪自誇分花作貌更含葩不從宋玉牆窺立  
羞向安仁果擲車十二雕闌對清曉細細蛾眉閒自掃  
玉笋慵描交頸鴛金蓮怕踏聯心草祇緣早歲解瑤琴

從姨學得鳳凰吟絃絃掩抑嬌難盡句句淒清怨自深  
却嫌盡日知音少坐向綠窓彈不了萍葉生憎逐水流  
楊花愁殺當空攪來來去去碧池邊兩兩三三總是仙  
此際含情復含態此時相見即相憐玳瑁環無那香風繞  
况是桃源春未曉拂地飄飄紫繡襦稱身窄窄紅羅襖  
紅羅紫繡蕩蘭烟兩情兩意忽相牽當時自擬孤生柏  
此日因成並蒂蓮杏梁梓枳芙蓉帳百尺珊瑚列相向  
綺鳳差池弱水傍春風繚繞高唐上弱水高唐路幾千

詎知只在鏡臺前即教白首難分判若比黃金未是堅  
胡然龍劍分離早忽聽鸞簫中道宵一朝揮手謝人間  
枕落遊仙魂縹緲仙家縹緲景色奇紫烟綠霧結成居  
宮堯翠館珠星綴晝靄文疏壁月垂珠星壁月分交錯  
瑤草琪花亦堪樂飛瓊解舞雪花翻雙成美歌珠串落  
可惜歡娛別有天可憐儂結斷腸緣聞說山中年似日  
那知世上日如年深深庭館遊絲駐寂寂笙歌空復處  
秋色偏驚折柳條月華不動高梧樹鄰家少女未經愁

十五年光嫁五侯夜夜燈前調錦瑟時時花下弄箜篌  
燈前花下心相許此日深情復誰語綺窓空織錦文成  
青鳥不傳素書與夢裏相逢難自憑玉顏雲鬢漸凋零  
古來薄命非由妾試看迢迢織女星

塞上曲

單于夜合圍漢士不思歸縱矢鵬前獵橫身馬上飛白  
登霜氣早青海日光微為有封侯骨年年卧鐵衣

直中作

條風輦道淨微塵內詔傳宣促侍臣別殿香飄黃帔揭  
纏龍帖子賜宜春

少年行

鏤金鞍子百花裝三尺流虹飲血光白日報讎官市上  
青春調笑酒壚傍

宮詞二首

海子周遭長荻芽春深乘艫不乘車阿誰貪看游魚戲  
拋却新簪茉莉花

曉來別院遞笙歌  
百子池頭遍綠荷  
睡起無聊庭下立  
笑拈竿子打蜂窠

郭孝子球

球字友虞平湖人  
母早孀兩目皆瞽  
球以古甜目漸明  
嘉靖間倭入寇負  
母塗行冠猝至將  
加刃球以手搏血  
濺襟帶適尉卒至  
幸脫天啟間詔旌  
之有舜鳴集

送魯懷楊北上

欽定四庫全書

楊孝詩集

卷十三

今日何人薦馬卿  
懷中應賦子虛成  
十年與爾同風雨  
愁絕陽關第四聲

張訓導滂

滂字大霖號芙  
江海鹽人貢授訓導

九日登龍江

紅樹著霜殘葉飛  
山含紫翠晴烟微  
稻香村落酒初熟  
秋老江天雁未歸

陳秀才楫

楫字濟之號來山海鹽人  
嘉隆間文學流寓梁溪  
詩見皇明詩統

宿金山海潮軒送陳貞父

寺剎臨鮫室孤峰峙海門  
浮雲千仞碧落日半江昏  
白雪憐已調青山惜酒尊  
明朝相憶處只在海潮軒

玄嶽山人姚充

充字叔信自號玄嶽山人  
又稱西郭翁秀水人嘉  
隆時布衣父為讎家所陷  
繫獄充請以身代居囚

欽定四庫全書

楊孝詩集

卷十三

圓數年有僧正念能詩  
亦以事繫獄盡以詩告授  
充一日令聞獄中讀書聲  
出之日偕戚符卿項上林  
及四方名士結詩社唱和  
有尚玄草咏物詩

周公瑕山居

六月巖扉靜輕舳偶一過  
涼陰高落梓香氣近浮荷  
場曠雞豚散林深鳥雀多  
相逢幽興愜隔岸復聞歌

九日登金明寺閣同郭次甫董玄宰限山字

考見  
題咏

寶閣千尋起丹梯  
九日攀雲陰初度  
海雨氣忽沉山林

外楓俱落沙邊鳥獨還誰知寥廓士一半出人間

湖溪樓

五龍橋畔散芳洲登眺凌虛昔有樓烟靄乍分楊柳榭  
風光不斷木蘭舟塔懸寶髻當杯出波蕩湘裙入鏡遊  
共說烈姬詩句好年年春色喚人愁

附考在駕湖北岸即凌虛閣故址廟側有羅  
愛卿元之名姬善詩死節墓後園銀杏樹下

馮秀才敏効

敏効字忠卿號季山汝弼次子負才不遇杜門著

書有小有亭集初汝弼與諸子避倭假宿東園因  
拆二字作口號云曲川地可耕長刀砍低樹元來  
腹有文軍口三十去令諸子合之敏効年十五應  
聲曰是勦寇二字明日得報大捷

京口夜泊

客途朝復暮一枕傍孤城戍鼓斷鄉夢破船多月明潮  
平江有信雲靜雁無聲何處悲歌起推篷問五更

山墅雨後



風雨逗春寒，青山繞畫闌。  
鳥聲穿磴落，林靜帶雲看。  
對酒今朝熟，憐花昨夜殘。  
誰知苔徑滑，莫惜倚筇難。

宿太倉道中

婁江淹客思，風急暮蕭蕭。  
挂笠分斜雨，停歌聽落潮。  
魚鮮紅舸疾，蜃氣碧天遙。  
際此聊棲泊，悠然醉濁醪。

移舟買菊

蕭條憐暮色，攜伴訪城陰。  
日落猶穿戶，花殘半在林。  
不辭溪上棹，聊解橐中金。  
載得幽芳去，閒庭秋正深。

戈布衣思齊

思齊字子賢號龍村平湖人嘉隆間布衣有垂裕

堂集

湖樓登眺

那向三峰索畫圖林花著雨客提壺老夫未倦登臨興  
且傍圓沙看浴鳬

白巖老人沈懋嘉

公諱懋嘉字會真號白巖不肖季友五世祖也為

人仁厚閒雅少穎敏工文章詩體清新蕭蕭跨俗  
時伯兄晴峰已入中秘仲兄明石亦舉孝廉公在  
舉場三十年坎坷不遇乃退而自放時帶葛巾披  
白衲採蓴行藥以終老焉有白巖遺稿

秋鳥

陳山西麓海東頭細網長竿帶綠罽買得山禽如粉脫  
屠墳十里稻花秋

附考平湖乍浦陳山屠康僖墓林木蔚蒼有鳥從南海  
來集其上秋來春去初至剖其腹猶有青椒當是日

本國所產大者名刺毛鶯亦曰鷓鴣  
中者花雞小者鑽籬湖中佳品也

當湖竹枝十首

考見  
題咏

鷓鴣湖春色

阿郎曾說漢陽城鷓鴣名傳舊綠汀  
問郎可似東湖上

小小春沙好踏青

案山曉翠

濛濛曉翠濕鞋弓天晴來上案山峰  
從頭一望珠樓好

港口條條戲九龍

三寺兩鐘

撐船採菱歌懊儂深深菱蕩翠烟濃日斜風起人歸去

三寺聲聲打暮鐘

六橋晴市

鮮船都在水西棚三尺黃魚似絳繒陣陣腥風朝市散  
紅旗影裏買春冰

東田社鼓

夫插新秧婦踏車秋收一半入官家村社東田晚

籬脚開殘野菊花

西浦魚罾

十里清波湖面長  
魚牀蟹簍斷水風涼  
膏騰醉倒漁哥子  
自挂蓑衣晒夕陽

南村書屋

張家堆上屋層層  
聞說當年萬卷稱  
扇扇碧紗窓影亂  
為郎深夜剪書燈

北原牧笛


世事無端去似梭  
東城西市看忙多  
不若牧兒北原上  
夕陽林外唱山歌

霍氏行祠

花街東畔是儂家  
閒看迎神晚放衙  
拂拂紅旗春賽罷  
霍王祠下採藤花

魯公古墓

家家寒食各紛紛  
留得輕風上繡裙  
滿地紙錢人不掃  
草花紅過魯家墳



樵李詩繫卷十三